

# KARTA PA EBREUS

## Introduson

E libru ka konta kin ku skirbil, nin kin ki skirbidu pa el, ma i klaru kuma i skirbidu pa jinti ku kunsiba librus di Lei diritu. Asin i parsi sertu kuma i mandadu pa ebreus, ku sedu israelitas. I bon pa studa e libru juntu ku libru di Sirmonias. I skirbidu antis di kaida di Jerusalem na anu 70, pabia sirmonias na templu kontinuaba inda.

## Rusumu

- 1.1-3 Jesus, Parsensa sertu di Deus
- 1.4—2.18 Jesus, mas minjor di ki anjus
- 3.1—4.13 Jesus, minjor di ki Moisés ku Josué
- 4.14—8.6 Jesus, minjor saserdoti
- 8.7—9.22 Jesus ranja un kontratu minjor
- 9.23—10.18 Jesus i minjor sakrifisiu
- 10.19-39 No dibi di fika firmi na fe
- 11.1-40 Omis ku minjeris di fe
- 12.1—13.25 Konsijus di kabantada

## Deus papia ku nos na Kristu

**1** <sup>1</sup>Na tempu ku pasa, Deus papia manga di bias, na manga di manera, ku no papes di antigu pa boka di anunsiaduris. Ne dias di kabantada i papia ku nos suma ki mandanu si Fiju, <sup>2</sup>kil ki pui pa i yarda tudu kusa, ki kumpu mundu tambi pa si mon. <sup>3</sup>I el ku sedu bri-liu di gloria di Deus, ku si parsensa sertu; el ku nguenta tudu kusa ku puder di si palabra. Dipus di da si vida pa yangasa limpesa di no pekadu, i sinta na mon direita di garandi Rei na seu. <sup>4</sup>I fasidu mas

garandi di ki anjus, suma ku nomi ki yarda i mas garandi di ki nomi di anju.

## Garandesa di Fiju di Deus

<sup>5</sup>Deus nunca ka fala nin un anju: “Abo i ña Fiju; aos N padiu.”  
Tambi i ka fala di nin un anju: “N na sedu si Pape; el i na sedu ña fiju.”

<sup>6</sup>Oca ki na mandaba si purmeru Fiju na mundu, i fala tambi: “Tudu anjus di Deus pa e adoral.”

<sup>7</sup>I fala di anjus: “Kil ku ta fasi si anjus pa e sedu bentus, si servus pa e sedu linguas di fugu.”

**1.1:** Num 12.6-8; Lei 18.15; Gal 4.4   **1.2:** Jon 1.3  
**1.3:** Jon 1.14; 14.9; 2 Kor 4.4; Kol 1.15   **1.3:** Kap 7.27;  
Jon 1.29   **1.3:** Sal 110.1; At 2.33   **1.4:** Ef 1.21; Fil 2.9-10  
**1.5:** Sal 2.7   **1.6:** Luk 2.13-14; 1 Ped 3.22  
**1.7:** Sal 104.4

<sup>8</sup>Ma i fala di Fiju:

“O Deus, bu tronu na kontinua pa sempri;

Na bu renansa bu ta gubernu ku justisa.

<sup>9</sup>Bu ama kil ki bon; bu odia kil ki mau.

E ku manda Deus, bu Deus, i unjiu ku azeiti di kontentamentu,

i dau lugar riba di bu kumpañosis.”

<sup>10</sup>I fala inda:

“Abo, Señor, na kumsada bu kumpu tera;

seu sedu tarbaju di bu mon.

<sup>11</sup>E na disparsi, ma abo bu na kontinua.

Tudu elis na beju suma ropa;

<sup>12</sup>bu na mbulja elis suma kapa; suma ropa e na torkiadu; ma abo bu sedu mesmu; bu anus ka ta kaba.”

<sup>13</sup>Deus nunka i ka fala nin un anju:

“Sinta na ña direita tok N pui bu inimigus suma tapeti pa bu diskansa pe nel.”

<sup>14</sup>Ke ku sedu anjus? Elis i spiritus ku ta sirbi, ku Deus manda pa e bin juda kilis ku na bin tene salbason.

### Garandi salbason

**2**<sup>1</sup>E ku manda i minjor pa no pega ku mas firmesa na kusas ku no obi, pa ka no disvia di rumu. <sup>2</sup>Si palabra ku anjus fala tenba forsa, ku, si algin negal o i disobdisil, i ta risibi kastigu ki mersi, <sup>3</sup>kuma ku no na kapli si no ka liga e salbason ku sedu garandi dimas? I Señor

propi ku anunsia e salbason purmeru. Dipus, kilis ku obil bin danu sertesa del. <sup>4</sup>Deus junta si tustumuñu juntu ku di selis, manera ki fasi manga di koldadi sinal ku milagri, i rapati tambi dons di Spiritu Santu suma ki misti.

### Kristu ranjanu salbason

<sup>5</sup>Na bardadi, i ka anjus ku Deus ntrega gubernu di mundu di amaña, ku no na fala nel. <sup>6</sup>Na un sertu lugar na Skritura algin testifika, i punta Deus:

“Kin ki omi, pa bu lembra del? O kin ki fiju di omi pa bu intresa del?”

<sup>7</sup>Bu fasil un bokadu mas pikininu di ki anjus, bu pul koroa di gloria ku onra, <sup>8</sup>bu pui tudu kusa bas del.”

Suma ki pui tudu kusa bas di omi, i ka disa nada ki ka pui bas del. Te gosi no ka oja kuma tudu kusa sta bas del, <sup>9</sup>ma no oja Jesus, kil ku fasidu un bokadu mas pikininu di ki anjus pa i pudi muri pa tudu jinti, pa bondadi di Deus. No ojal gosi ku koroa di gloria ku onra, pabia di mortu ki sufri. <sup>10</sup>I bon manera ku Deus, ku kumpu i nguenta tudu kusa, i fasi Jesus pifitu pabia di si sufrimentu, pa i pudi tisi manga di fiju pa gloria. Jesus i kil ku na gia elis pa salbason.

**1.8:** Sal 45.6-7 **1.9:** Is 61.1; At 4.27; 10.38

**1.10:** Sal 102.25 **1.11:** Is 34.4; Mat 24.29,35;

2 Ped 3.7,10 **1.13:** Sal 110.1 **2.2:** At 7.53

**2.2:** Sir 10.1-2; Num 11.33; Lei 4.3-4; 27.26

**2.3:** Mat 4.17; Luk 1.2 **2.4:** Mar 16.20 **2.5:** 2 Ped 3.13

**2.6:** Sal 8.4-5 **2.9:** Fil 2.7-9 **2.10:** Luk 24.46-47

<sup>11</sup>Asin, kil ku ta santifika ku kilis ku santifikadu e sedu di un mesmu Pape. E ku manda Jesus ka burguñu coma elis ermons. <sup>12</sup>I fala Deus:

“N na konta ña ermons bu nomi;

N na ngabau ku kantiga na metadi di juntamentu.” <sup>13</sup>I fala tambi:

“N na pui ña fiansa nel.”

I fala mas:

“Alin li ku fijus ku Deus dan.”

<sup>14</sup>Suma ku fijus ta junta karni ku sangi, asin tambi ku el i junta ne mesmu kusas, pa i pudi muri; pabia di si mortu i pudi vensi kil ku ten puder riba di mortu, ku sedu diabu, <sup>15</sup>pa i pudi libra tudu kilis ku sedu katibu tudu se vida pabia di medu di mortu. <sup>16</sup>Na bardadi i ka bin toma forma di anjus, ma i toma di fijus di Abraon. <sup>17</sup>E ku manda i tenba ku fasidu suma si ermons na tudu manera, pa i pudi sedu šef di saserdoti ku ta mostra pena, ku sedu fiel na si tarbaju danti di Deus pa yangasa purdon di pekadu di pobu. <sup>18</sup>Gosi i pudi juda kilis ku sta na tentason, manera ku el propi i pasa tentason ku sufrimentu.

### Jesus i mas Moisés

**3** <sup>1</sup>Asin, ermons krenti ku Deus coma, bo pui sintidu na Jesus, ku sedu Apostolu i Šef di Saserdoti

di ki fe ku no ta konta kuma i di nos. <sup>2</sup>I sedu fiel pa kil ku pul na tarbaju, suma ku Moisés tambi seduba fiel na kasa di Deus. <sup>3</sup>Kin ku kumpu kasa i ten mas onra di ki kasa. Asin tambi ku Jesus mersi mas gloria di ki Moisés. <sup>4</sup>Kada kasa ten kin ku kumpul, ma kin ku kumpu tudu kusa i Deus. <sup>5</sup>Na bardadi Moisés, suma servu, i seduba fiel na kasa di Deus, pa konta kusas ku Deus na bin konta mas tardi, <sup>6</sup>ma Kristu, suma Fiju, i fiel na si propi kasa. I anos ku sedu ki kasa, si no rakada no fiansa ku no speransa gloriosu firmi te na fin.

### Diskansu pa pobu di Deus

<sup>7</sup>Asin, suma ku Spiritu Santu fala:

“Aos, si bo obi si vos,

<sup>8</sup> ka bo ndurusi bo korson suma bo papes di antigu, oca e provoka Deus na ki tempu di probason na lala, <sup>9</sup> nunde ke tentan, e proban; korenta anu e oja kusas ku N fasi.

<sup>10</sup> E ku manda N raiba kontra ki jinti; N fala kuma, esis, se korson ta yara sempri; e nega kungsi ña kamiñu.

<sup>11</sup> Asin N jurmenta na ña raiba kuma, e ka na yentra na ña lugar di diskansu.”

<sup>12</sup>Ermons, bo toma sintidu pa ka nin un di bos tene mau korson, ku ka ta fia, pa i bin fasil lunjusi di Deus bibu. <sup>13</sup>I minjor bo ba ta konsija ntru tudu dia ku na faladu

**2.11:** Mat 28.10   **2.12:** Sal 22.22   **2.13:** Sal 18.2  
**2.13:** Is 8.18   **2.14:** Jon 1.14   **2.14:** 1 Kor 15.54-56;  
 2 Tim 1.10   **2.17:** Kap 4.15; 5.1-2   **3.2:** Num 12.7  
**3.4:** Zak 6.12; Mat 16.18   **3.5:** Sai 14.31; Lei 18.15,18-19  
**3.6:** 1 Kor 3.16; Ef 2.21-22; 1 Tim 3.15; 1 Ped 2.5  
**3.6:** Mat 10.22   **3.7:** Sal 95.7-11

“Aos”, pa ka nin un di bos fika duru pa nganu di pekadu. <sup>14</sup>Gosi no toma parti na Kristu, si no rakada no fiansa di kumsada firmi te na fin.

<sup>15</sup>Suma ku Skritura fala: “Aos, si bo obi si vos, ka bo ndurusi bo korson suma na ki dias di provokason.” <sup>16</sup>I kal jinti ku obil, e provokal? Nta i ka sedu tudu ki jinti ku Moisés tira na Ejitu? <sup>17</sup>Kin ku Deus paña raiba ku elis korenta anu? I ka kilis ku peka, ku se difuntus kai na lala? <sup>18</sup>Pa bakin ki jurmenta kuma e ka na yentra na si lugar di diskansu? I ka kilis ku disobdisi? <sup>19</sup>No oja kuma e ka pudi yentra pabia e ka fia.

**4** <sup>1</sup>Suma no ten inda purmesa di yentra na si lugar di diskansu, no toma sintidu pa ka nin un di bos bin falia, i pirdi entrada, <sup>2</sup>pabia anos tamba no kontadu Bon Noba suma elis, ma palabra di Bon Noba ke kontadu ka tenba nin purbitu nelis, pabia i ka kontra ku fe na kilis ku obil. <sup>3</sup>I anos ku sedu krenti ku na yentra na lugar di diskansu, suma ki fala:

“Asin N jurmenta na ña raiba kuma,  
e ka na yentra na ña lugar di diskansu.”

I fala asin kontudu si tarbaju kaba disna di kriason di mundu. <sup>4</sup>I fala na un lugar na Skritura aserka di setimu dia kuma, Deus diskansa di tudu si tarbaju na setimu dia. <sup>5</sup>I torna fala utru bias ne lugar ku no ripiti ja: “E ka na yentra na ña lugar di diskansu.” <sup>6</sup>Suma ku utrus ten ku yentra nel, suma tamba kilis

purmeru ku kontadu Bon Noba e ka yentra pabia di se disobdiensia, <sup>7</sup>Deus marka mas utru dia ku faladu “Aos.” Dipus di manga di anu Deus fala na boka di Davi e palabra ku no ripiti ja: “Aos, si bo obi si vos, ka bo ndurusi bo korson.”

<sup>8</sup>Si Josué da elis ba diskansu, Deus ka na falaba mas aserka di utru dia. <sup>9</sup>Asin i falta inda un diskansu pa pobu di Deus suma di setimu dia, <sup>10</sup>pabia kil ku yentra na diskansu di Deus, es tamba i diskansa di si tarbaju, suma ku Deus diskansa di di sil. <sup>11</sup>No fasi forsa pa yentra ne lugar di diskansu pa ka ningin sigi isemplu di kilis ku disobdisi.

<sup>12</sup>Palabra di Deus i bibu, i forti. I ta mas korta di ki spada di dus boka; i ta yentra te dentru di algin nunde ku alma ku spiritu ta rapati, te na metadi di juntamentu di os. I kapas di julga vontadi ku pensamentu di korson. <sup>13</sup>I ka ten nada ku Deus kumpu ku pudi sukundi del, ma tudu kusa sta nun i klaru na uju di kil ku no ten ku da konta si dianti.

### Jesus i Saserdoti ki mas tudu

<sup>14</sup>Suma ku no tene un garandi Êf di Saserdoti ku sedu Jesus, Fiju di Deus, ku yentra dentru di seu, no fika firmi na no fe. <sup>15</sup>No ka tene un êf di saserdoti ku ka pudi ten pena di no frakesa, ma un ku tentaduba

**3.16:** Num 14 **3.17:** Num 14.29; 26.65; 1 Kor 10.5

**3.18:** Kap 4.6; Lei 1.34-38 **4.2:** Kap 3.18-19

**4.3:** Sal 95.11 **4.4:** Kum 2.2 **4.6:** Kap 3.18-19

**4.7:** Kap 3.7-8 **4.11:** Kap 3.12-13 **4.12:** Jer 23.29;

1 Kor 14.24-25; Ef 6.17; Apok 1.16 **4.13:** Sal 33.13-15;

90.8; 139.1-12 **4.14:** Kap 3.1; 6.20; 7.26; At 1.9

**4.15:** Luk 4.1-13; 22.42; Jon 12.27

na tudu, suma nos, ma ku nunca ka peka. <sup>16</sup>Asin no ciga ku fianza dian-ti di tronu di Deus, nunde ku no na oja fabur, pa no yangasa mise-rikordia ku fabur, ku ajuda na ora ku no pirsisa del.

**5** <sup>1</sup>Tudu sêf di saserdoti i kujidu na metadi di omis, i pudu pa i sta dian-ti di Deus pa fabur di jin-ti, pa leba ofertas ku sakrifisius pa pekadu. <sup>2</sup>Suma el propi i fraku na manga di manera, i pudi mostra manga di pasensa pa kilis ku ka si-bi, ku ta yara. <sup>3</sup>I pabia des ki dibi di fasi sakrifisiu pa pekadu; i ka son pa pobu, ma tambi pa si kabesa. <sup>4</sup>Ningin ka ta toma e lugar di ris-pitu pa si kabesa, ma i Deus ku ta comal, suma ki coma Aron.

<sup>5</sup>Asin tambi Kristu ka toma e ga-randesa pa si kabesa pa i sedu Sêf di Saserdoti, ma kil ku dal ki lugar i Deus, ku fala:

“Abo i ña Fiju; aos N padiu.” <sup>6</sup>I fala tambi na utru lugar:

“Abo i Saserdoti pa sempri na yardansa di Melkisedek.”

<sup>7</sup>Oca i na vivi na mundu, i yalsa vos ku larma na orason, i pidi Deus, kil ku pudiba libral di mortu. I obidu pabia el i rispitudur di Deus. <sup>8</sup>Kon-tudu el i Fiju, i nsina obdisi pabia di si sufrimentu. <sup>9</sup>Oca i fasidu pifitu, i bin sedu fonti di salbason ku ka ta

kaba pa tudu kilis ku obdisil. <sup>10</sup>Deus nomial pa i sedu Sêf di Saserdoti na yardansa di Melkisedek.

### Pirigu di bandona fe

<sup>11</sup>No tene manga di kusa di fala aserka de asuntu, ma i kansadu pa splika bos, manera ku bo ka ta lestu ku ntindi. <sup>12</sup>Bo ten tempu di sedu ja pursoris, ma inda bo pirsisa di algin pa torna da bos purmeru nsina-mentu di palabra di Deus. Te gosi bo pirsisa di dadu liti, te pa bianda risu. <sup>13</sup>Kil ku na bibi liti inda i mininu, i ka ten ntindimentu di rapara ben ku mal, <sup>14</sup>ma bianda risu i pa ga-randi, ku ten manga di spiriensia ku pratika pa ntindi ben ku mal.

**6** <sup>1</sup>Asin no ten ku disa kumsada di nsinamentu aserka di Kristu, no bai dian-ti pa nsinamentu mas kom-pletu. Ka no torna pui alisersu di ki purmeru nsinamentu, di ripindi di kusas ku no ta fasi ku ta tisi mortu, di fe na Deus, <sup>2</sup>di nsinamentu di ba-tismus, di pui mon riba di algin pa bensual, di resureison di mortu, ku di kastigu ku ka ta kaba. <sup>3</sup>Asin ku no ten ku fasi, si Deus disanu.

<sup>4</sup>Kilis ku ciga di risibi lus di Deus, ku sinti gustu ja di kil ku Deus danu di seu, ku toma parti na Spiritu San-tu, <sup>5</sup>ku spurmenta kuma palabra di Deus i bon, ku sinti forsa di mundu ku na bin bin, <sup>6</sup>si dipus e bin kai, e ka ta pudi lebadu utru bias pa ripin-dimentu, pabia ku se mon propi e na krusifika Fiju di Deus utru bias, e na pui pa jinti fasi trosa del.

<sup>7</sup>Deus ta mostra si bondadi pa con ku ta bibi yagu di cuba ku ta

4.16: Ef 2.18; 3.12 5.1: Kap 2.17; 8.3-4 5.3: Kap 7.27; Sir 4.3; 9.7 5.4: Sai 28.1; Num 17.1-9; 2 Kron 26.18  
5.5: Sal 2.7 5.6: Kap 6.20; 7.1,16-17 5.7: Mat 26.39, 42,44; 27.46 5.8: Fil 2.8 5.9: Kap 2.10 5.10: V 6  
5.11: Jon 16.12 5.12: 1 Kor 3.1-3; 1 Ped 2.2  
5.13: 1 Kor 13.11; 14.20; Ef 4.13-14 6.1: Kap 5.12; Fil 3.12-14 6.2: At 6.6; 19.4-5; 24.25; 1 Kor 15.20-21; Apok 20.10-15 6.4: Kap 10.32 6.6: Kap 10.29

kai riba del manga di bias, i ta da bon planta ku bali pa kil ku labral, <sup>8</sup>ma con ku ta pruduzi pe di spiñu ku paja brabu i ka bali nada. I pertu pa Deus maldisual; na kabantada i na kemadu.

<sup>9</sup>Mesmu ku no fala asin, ña kiridu amigus, no na pera kusas minjor di bos, kusas ku ta kumpaña salbason. <sup>10</sup>Deus i ka injustu pa diskisi di bo tarbaju, ku amor ku bo mostra pa el, manera ku bo sirbi si pobu, suma ku bo na fasi te gosi. <sup>11</sup>I no vontadi pa kada un di bos mostra mesmu interes te na fin, pa bo pudi yangasa kusas ku bo na pera. <sup>12</sup>No ka misti pa bo bin sedu prigisosu, ma pa bo remenda kilis ku na risibi kil ku Deus purmiti, pabia di se fe ku pasensa.

### Deus ta kumpri si purmesa

<sup>13</sup>Oca ku Deus fasi si purmesa pa Abraon, suma ki ka teneba utru algin mas garandi pa jurmenta nel, i jura pa si kabesa, <sup>14</sup>i fala: “N jurmenta kuma N na dau garandi benson; N na buri bu jorson ciu.” <sup>15</sup>Abraon pera ku pasensa, i yangasa kil ku Deus fala i na da. <sup>16</sup>Si un algin jurmenta, i ta jurmenta na nomi di utru ku sedu mas garandi di ki el. Juramentu i un kusa sertu ku ta kaba ku tudu palabra. <sup>17</sup>Asin Deus misti mostra klaru pa kilis ku na risibi kusa ki fala i na da, kuma, kusa ki tene na sintidu ka na maina. E ku manda i papia ku juramentu. <sup>18</sup>Asin i ten e dus kusa ku ka pudi maina, ku Deus ka pudi konta mintida pa el, ku ta danu koražen,

anos ku sta suguru, manera ku no pega na speransa ku sta no dianti. <sup>19</sup>No ten e speransa suma feru di fundia ku ta sugura no alma firmi. I ta yentra te dentru di kurtina di seu <sup>20</sup>nunde ku Jesus bai dianti di nos, i yentra la pa no fabur. I fasidu Șef di Saserdoti ntidu, konformi yardansa di Melkisedek.

### Melkisedek, figura di Kristu

**7** <sup>1</sup>E Melkisedek seduba rei di Salen, saserdoti di Deus ku sta riba di tudu. Oca Abraon na riba, dipus ki geria ku ki reis, i ngaña, Melkisedeki sai i kontra ku el, i bensual. <sup>2</sup>Abraon dal desimu parti di tudu ki tisi. Si nomi mostra purmeru kuma i rei justu. Dipus tamba i rei di Salen, ku sedu rei di pas. <sup>3</sup>No ka lei nada aserka di si pape nin si mame, nin si jorson; i ka tene kumsada di dias nin fin di vida, ma, suma Fiju di Deus, i saserdoti pa sempri.

<sup>4</sup>Bo oja gora kuma ku el i sedu-ba algin garandi. Abraon propi, ku sedu no pape di antigu, dal desimu parti di tudu ki tisi di gera. <sup>5</sup>Lei di Moisés manda kilis di jorson di Levi, ku ten tarbaju di saserdoti, pa e kobra pobu dizimu, ku sedu kilis di si rasa, kontudu e sedu fijus di Abraon tamba, <sup>6</sup>ma Melkisedek, ku ka sedu di jorson di Levi, i toma dizimu na mon di kil ku risibi purmesa, i bensual, ku sedu Abraon. <sup>7</sup>I ka ten nin un duvida kuma kil ku ta

**6.8:** Kum 3.17-18 **6.10:** Mat 10.42; 25.40

**6.11:** Kap 3.6,14 **6.12:** Kap 10.36

**6.13:** Kum 22.16-17 **6.16:** Kum 31.53; Jos 9.15-20

**6.19:** Kap 9.7 **6.20:** Kap 4.14; 9.24 **7.1:** Kap 5.6;

Kum 14.18-20 **7.5:** Num 18.21,25-32

da benson i mas di ki kil ku ta risibi benson. <sup>8</sup>Na kasu di levitas, omis ku ta muri e ta toma dizimu, ma ne kasu di Melkisedek, dizimu tomadu pa kil ku Skritura fala kuma i sta di vida. <sup>9</sup>No pudi fala kuma Levi, ku ta risibi dizimu, el propi i paga dizimu na Abraon, <sup>10</sup>pabia i staba inda na kurpu di si pape oca Melkisedek kontra ku el.

<sup>11</sup>Fundamentu di lei ku Deus da pobu i pa forma saserdotis na jorson di Levi. Si tarbaju di saserdotis di jorson di Levi staba kompletu, i ka pirsis ba torna lantanda utru saserdoti di yardansa di Melkisedek, ku ka sedu di yardansa di Aron. <sup>12</sup>Si yardansa di saserdoti mundantadu pa utru jorson, lei ten ku mudadu tambi. <sup>13</sup>No Siñor, kil ku faladu e kusas del, i di utru jorson. Ningin di ki jorson ka ciga di sirbi na altar. <sup>14</sup>I sibidu diritu kuma el i padidu na jorson di Judá. Moisés ka fala nada de jorson oca ki na papia di saserdotis.

### **Kristu i saserdoti pa sempri**

<sup>15</sup>Asuntu torna inda mas klaru suma ki parsi utru saserdoti suma Melkisedek, <sup>16</sup>ku ka fasidu saserdoti konformi lei o ordi di omi, ma i konformi puder di un vida ku ka ta kaba. <sup>17</sup>Skritura diklara aserka del: “Abo i saserdoti pa sempri konformi yardansa di Melkisedek.” <sup>18</sup>Asin mandamentu antigu pudu di parti

pabia i fraku, i ka ten puder. <sup>19</sup>Lei ka pui nada pa i sta kompletu. Gosi no tisidu un minjor speransa ku ta cigantanu pa Deus.

<sup>20</sup>E nobu saserdoti i fasidu ku juramentu. Ki levitas fasidu saserdotis sin juramentu, <sup>21</sup>ma pa e saserdoti Deus jurmenta, i falal:

“Siñor jurmenta, i ka na maina: ‘Abo i saserdoti pa sempri.’”

<sup>22</sup>Asin Jesus fasidu fiadur di un kontratu mas minjor, suma ku Deus fasil ku juramentu.

<sup>23</sup>Na bardadi, ki utru saserdotis e ciu ba; e ta rindi ñutru. Mortu ta tuji elis kontinua na tarbaju, <sup>24</sup>ma es, suma i na bibu pa sempri, si tarbaju di saserdoti ka ta kaba. <sup>25</sup>E ku manda tambi i pudi da salbason kompletu pa kilis ku bin pa Deus na si nomi, suma ki na bibu pa sempri pa i roga Deus pa elis.

<sup>26</sup>No pirsisaba di un Șef di Saserdoti suma es, puru, sin pekadu, sin manca, lunjusidu di jinti ku ta peka, yalsadu pa un lugar mas altu na seu, <sup>27</sup>ku ka pirsisa, suma utru șefis di saserdoti, di fasi sakrifisiu kada dia pa si propi pekadu purmeru, dipus pa pekadu di pobu, pabia i ronia ja un bias, oca ki da si kurpu. <sup>28</sup>Lei ta fasi omis fraku pa e sedu șefis di saserdoti, ma palabra di juramentu, ku bin dipus di lei, i nomia Fiju, kompletu pa sempri, pa i sedu Șef di Saserdoti.

### **Jesus no Șef di Saserdoti**

**8** <sup>1</sup>Agora ne komborsa tudu, ku sa ku no misti fala i es, kuma no

7.11: Kap 8.7 7.14: Luk 1.32; 3.23,31,33; Apok 5.5

7.17: Kap 5.6 7.18: Rom 8.3 7.19: At 13.39;

Rom 3.20-21,28 7.21: V 17; Sal 110.4 7.22: Kap 8.6;

9.15; 12.24 7.24: Apok 1.18 8.25: Rom 8.34; 1 Tim 2.5

7.26: Ef 1.20; 4.10 7.27: Kap 5.3; 9.26; Sir 16.6,11,15;

Rom 6.10 8.1: Kap 1.3; At 2.33

tene un Șef di Saserdoti de koldadi, ku sta sintadu na direita di tronu di Rei la na seu, <sup>2</sup>ku na sirbi na lugar sagradu, na tenda di bardadi ku Siñor kumpu, i ka omi.

<sup>3</sup>Tudu șef di saserdoti pudu pa i pursenta ofertas ku sakrifisius; asin e saserdoti tambi i ten ku tene un kusa pa pursenta. <sup>4</sup>Si i staba na tera, nin i ka na seduba saserdoti, pabia i ten ja saserdotis ku ta pursenta ofertas konformi lei. <sup>5</sup>E na tarbaja na un lugar ki son figura ku sombra di kil ku sta na seu. I suma na kasu di Moisés, oca ki staba pa kumpu tenda, ku Deus avisal pa i toma sintidu di fasi tudu suma ki forma ki mostradu na monti. <sup>6</sup>Gosi Jesus dadu un tarbaju di saserdoti ki mas importanti di ki tarbaju di ki utrus, suma kontratu ki fasi na metadi di Deus ku si pobu i kontratu minjor, ku fasidu riba di minjor purmesas.

<sup>7</sup>Si ki purmeru kontratu ka tenba falta, i ka na seduba pirsis ranja utru pa pui na si lugar, <sup>8</sup>ma Deus kulpa elis oca ki fala e palabra:

“Siñor fala kuma dias na bin ki na fasi nobu kontratu ku pobu di Israel, ku pobu di Judá tambi.

<sup>9</sup>I ka na sedu suma kontratu ki fasi ku se papes antigu na dia ki pega elis na mon pa tira elis na tera di Ejitu. Suma ke ka sedu fiel pa ki si kontratu, i ka na liga mas ku elis. Asin ku Siñor fala.”

<sup>10</sup>I torna fala mas:

“Kontratu ku N na fasi ku pobu di Israel dipus di ki dias i es:

N na pui ña leis na se ntindimentu;

N na skirbi elis na se korson;

N na sedu se Deus;

elis e na sedu ña pobu.

<sup>11</sup>Ningin ka na nsina si visiñu, nin pa fala si ermon pa i kungsi Siñor, pabia tudu na kunsin, desdi jinti garandi te ki mas koitadi.

<sup>12</sup>N na sedu miserikordiosu ku se maldadi; di se pekadu N ka na lembra mas.” <sup>13</sup>Manera ku Deus fala: “Nobu kontratu”, i na coma ki purmeru kontratu beju. Asin kusa ku na bejusi, ku sta gastu, i ka na tarda pa disparsi.

### Nobu kontratu na sangi di Kristu

**9**<sup>1</sup>Purmeru kontratu teneba ordi di manera di sirbi Deus; i teneba tambi un lugar sagradu li na tera. <sup>2</sup>I kumpudu un tenda, purmeru parti, nunde ki sta kanderu, ku mesa ku pon ku ta pudu dianti di Deus. Es i ta comadu lugar sagradu. <sup>3</sup>Pa tras di sugundu kurtina i sta un lugar ku comadu lugar mas sagradu di tudu, <sup>4</sup>ku teneba altar di uru pa

**8.2:** Kap 9.11-12,24 **8.3:** Kap 5.1; Ef 5.2 **8.5:** Kap 10.1; Sai 25.40; Num 8.4; Kol 2.17 **8.6:** Kap 7.22; 2 Kor 3.6 **8.7:** Kap 7.11 **8.8:** Jer 31.31-34 **8.10:** Kap 10.16 **8.10:** Jer 30.22 **8.12:** Kap 10.17 **9.1:** Sai 25.8 **9.2:** Sai 26.1,35; Sir 24.5-6 **9.3:** Sai 26.31-33 **9.4:** Sai 30.1-6 **9.4:** Sai 25.10 **9.4:** Sai 16.33-34 **9.4:** Num 17 **9.4:** Sai 25.16; 2 Kron 5.10

kema nsensu, ku arka di kontratu, foradu tudu di uru, nunde ki sta un jaru di uru ku teneba maná, ku vara di Aron ku floraba, ku taguas di kontratu. <sup>5</sup>Riba di arka i staba kirubins ku ta mostra gloria di Deus. E distindi se asas riba di lugar nunde ku pekadu ta purdadu nel. Gosi no ka na splika tudu aserka de kusas.

<sup>6</sup>Suma ku e kusas sta asin ruma-du, saserdotis ta yentra sempri na purmeru tenda pa fasi se sirvis, <sup>7</sup>ma na sugundu lugar, son šef di saserdoti ku ta yentra un bias kada anu. I ka pudi yentra la sin leba sangi pa pursenta pa si kabesa, ku pekadu tambi ku jinti fasi sin e sibi. <sup>8</sup>Nes tudu, Spiritu Santu na mostra kuma kamiñu pa yentra na lugar mas sagradu di tudu i ka diskubridu inda, kontra purmeru tenda firma. <sup>9</sup>Es i sinal pa mostra e tempu li. Ofer-tas ku sakrifisius e ka pudi fasi kil ku na pursental pa i sta diritu na si konsiensia, <sup>10</sup>pabia i un kusa ku na fasidu son ku kumida, ku bibida, ku manga di sirmonia pa limpesa. E kusas tudu di fora, e pudu son te na tempu ku Deus na pui nobu ordi.

<sup>11</sup>Ma Kristu bin ja, suma Šef di Saserdoti di bon kusas ku sta ja. Tenda ki na sirbi nel i mas garandi, i mas kompletu; i ka tarbaju di mon di omi, nin i ka sedu de mundu ku

kumpudu. <sup>12</sup>Oca Kristu pasa na ki tenda, i yentra un bias pa sempri na lugar mas sagradu di tudu, i ka ku sangi di bodi ku di fiju di baka, ma ku si propi sangi; i ngaña libertason pa nos pa sempri. <sup>13</sup>Si sangi di bodi ku di turu, ku sinsa di fiju di baka wagadu riba di jinti kontaminadu, i ta purifika elis, i ta limpa kontaminason di kurpu, <sup>14</sup>ku fadi gora puder di sangi di Kristu pa limpa no konsiensia di kustumus ku ta tisi mortu, pa no sirbi Deus bibu! Ku ajuda di Spiritu ku ta bibu pa sempri, Kristu da si vida pa Deus, suma sakrifisiu ku ka tene manca. <sup>15</sup>E ku manda i ranja nobu kontratu na metadi di nos ku Deus, pa kilis ku comadu pudi risibi yardansa ku ka ta kaba ku Deus fala i na da. Es pudi sedu son pabia di un mortu, ku ta liberta jinti di mal ke fasi na tempu di purmeru kontratu.

<sup>16</sup>Na kasu di testamentu, i pisis proba kuma kin ku fasil muri, <sup>17</sup>pabia un testamentu ten forsa son dipus di un mortu; i ka ten nin un balur ora ku si dunu bibu inda. <sup>18</sup>E ku manda ki purmeru kontratu tambi ka fasidu sin sangi. <sup>19</sup>Moisés konta dianti di pobu tudu mandamentu suma ki sta na lei; dipus i toma sangi di fijus di baka ku bodis, ku yagu; i toma tambi un padas di po di isopi, ku lan burmeju, i waga riba di libru di lei propi, ku tudu jinti, <sup>20</sup>i fala: “Es i sangi di kontratu ku Deus manda pa bo sigi.” <sup>21</sup>Na mesmu manera i waga sangi tambi na tenda, ku tudu kusa ku ta usadu na sirmonia pa Deus. <sup>22</sup>Konformi

9.5: Sai 25.17-22; Sir 16.2 9.6: Sai 27.21; 30.7-8

9.7: Sai 30.10; Sir 16 9.8: Kap 10.19-20; Jon 14.6

9.9: Kap 10.1-4 9.10: Sir 11.2; Num 19.7; Rom 14.17;

Kol 2.16-17 9.11: Kap 8.2 9.12: Ef 1.7; Apok 1.5

9.13: Sir 16.14-16; Num 19.17 9.14: Kap 1.3; Rom 6.22;

1 Ped 1.19; 3.18; 1 Jon 1.7; Apok 1.5; 7.14

9.15: Rom 3.25 9.17: Gal 3.15 9.19: Sai 24.5-8;

Sir 14.4-7,49-52; 16.14 9.20: Mat 26.28

9.21: Sai 29.12 9.22: Sir 17.11

lei kuas tudu kusa ta purifikadu ku sangi. Pekadu ka pudi purdadu sin sangi ka darma.

### Sakrifisiu di Kristu ta limpa pekadu

<sup>23</sup>Ki kusas ku sedu figuras di kil ku sta na seu tenba ku purifikadu de manera, ma propi kusas di seu pirsisa di sakrifisiu mas minjor di ki esis, <sup>24</sup>pabia Kristu ka yentra na ki lugar sagradu ku omi kumpu, ku sedu figura di kil ki di bardadi, ma i yentra na seu propi, pa parsi dianti di Deus pa nos. <sup>25</sup>Şef di saserdotis ta yentra kada anu na lugar mas sagradu di tudu, ku sangi ki ka di sil, ma Kristu ka yentra manga di bias pa da si vida. <sup>26</sup>Si i asin, i tenba di sufri manga di bias disna di kumsada di mundu, ma gosi, na kabantada di tempu, i parsi un bias pa sempri pa sakrifika si vida pa kaba ku pekadu. <sup>27</sup>Tudu jinti ten ku muri un bias; dipus, julgamentu na bin. <sup>28</sup>Asin tamba Kristu da si vida un bias pa tira pekadu di manga di jinti. I na parsi sugundu bias; i ka pa trata di pekadu, ma pa salba kilis ku na peral.

**10** <sup>1</sup>Lei di Moisés i son un sombra di kusas bon ku na bin; i ka figura klaru di ki kusas. Mesmu sakrifisius e ta fasidu sempri kada anu. Lei, ku e sakrifisius, i ka pudi torna jinti ku ta fasil pa e purifikadu un bias. <sup>2</sup>Si i pudiba, ki sakrifisius na para, pabia, si jinti ku na fasil staba purifikadu ntidu, e ka na sintiba kulpadu di se pekadu nunka mas, <sup>3</sup>ma ki sakrifisiu di

kada anu i ta fasi jinti lembra di se pekadu, <sup>4</sup>pabia nin sangi di turu nin di bodi i ka pudi tira pekadu.

<sup>5</sup>E ku manda, oca Kristu na binba mundu, i fala:

“Bu ka misti sakrifisiu nin oferta,  
ma bu ranjan un kurpu.

<sup>6</sup>Bu ka kontenti ku limarias kemadu

nin ku sakrifisius pa pekadu.

<sup>7</sup>Dipus N fala: ‘O Deus, alin li pa N fasi bu vontadi,

suma ki sta skritu di mi na libru.’” <sup>8</sup>Purmeru i fala:

“Bu ka misti sakrifisiu nin oferta, nin limaria kemadu, nin sakrifisiu pa pekadu;

bu ka kontenti ku e kusas.” I fala asin mesmu ku e kusas ta pusementu konformi lei.

<sup>9</sup>Dipus i fala: “O Deus, alin li pa N fasi bu vontadi.” Asin i kaba ku purmeru sakrifisius pa i pui utru na se lugar.

<sup>10</sup>I na ki vontadi di Deus ku no santifikadu, pabia Jesus Kristu pusementu si kurpu pa sakrifisiu un bias pa sempri.

<sup>11</sup>Tudu dia kada saserdoti ta fasi si sirvis, i ta pusementu manga di bias mesmu sakrifisius ku nunka ka pudi tira pekadu, <sup>12</sup>ma Kristu pusementu sakrifisiu pa pekadu un bias pa sempri; dipus, i sinta na

9.24: Kap 6.20; 7.25; Rom 8.34; 1 Jon 2.1 9.25: V 7

9.26: Kap 7.27; 10.10; 1 Ped 3.18 9.27: Kum 3.19;

Ekl 3.20; 2 Kor 5.10; Apok 20.12 9.28: Rom 5.15;

1 Ped 2.24; 1 Jon 3.5 9.28: Mat 24.30; Jon 14.3;

Titu 2.13 10.1: Kap 8.5 10.4: Kap 9.13; Mik 6.6-8

10.5: Sal 40.6-8 10.10: Kap 9.12 10.11: Kap 7.27

10.12: At 2.33

mon direita di Deus, <sup>13</sup>nunde ki na pera, disna di ki tempu, pa tok si inimigus pudu bas del. <sup>14</sup>Son ku ki un oferta i purifika ntidu kilis ku santifikadu.

<sup>15</sup>Spiritu Santu tambu danu si tustumuñu. I fala purmeru:

<sup>16</sup>“Siñor fala: ‘Es i kontratu ku N na fasi ku elis dipus di ki dias:

N na pui ña leis na se korson;

N na skirbi elis na se

ntindimentu.’” <sup>17</sup>I torna

fala:

“N ka na lembra mas di se pekadu

nin kusas mau ke fasi.”

<sup>18</sup>Agora, nunde ku purdon sta pa e kusas, i ka pirsis mas oferta pa pekadu.

### **Konfiansa ku firmesa na fe**

<sup>19</sup>Asin, ña ermons, sangi di Jesus danu fiansa pa no yentra na lugar mas sagradu di tudu. <sup>20</sup>I yabrinu un nobu kamiñu di vida, oca i rasga kurtina ku sedu si propi kurpu. <sup>21</sup>Suma no tene un garandi saserdoti riba di kasa di Deus, <sup>22</sup>no ciga pertu ku korson limpu, ku garandi sertesa di fe, ku korson purifikadu di konsiensia mau, ku kurpu labadu ku yagu limpu. <sup>23</sup>No pega tesu

na fala di no speransa, pabia kil ku da purmesa i di fiansa. <sup>24</sup>No pensa na nutru, pa disperta nutru pa mostra amor, pa fasi bon tarbaju. <sup>25</sup>Ka no disa kustumu di junta, suma utrus ta fasi, ma no anima nutru kada bias mas, suma ku no oja Dia ku Siñor na bin mas na pertu.

<sup>26</sup>Si no ntema, no kontinua na peka dipus di risibi kuñisimentu di bardadi, i ka ten ja mas sakrifisiu pa pekadu, <sup>27</sup>ma son pa no pera, ku garandi medu, julgamentu ku fugu meduñu ku na kaba ku kilis ku sta kontra Deus. <sup>28</sup>Si algin kebra lei di Moisés, i ta matadu sin sinti pena del, si dus o tris jinti testifika kuma el i kulpadu. <sup>29</sup>Nta ke ku bo oja di algin ku masa Fiju di Deus, ku tene sangi di kontratu ki santifikadu ku el suma kusa lebi, ku papia mal kontra Spiritu di grasa? Bo kuda kuma ki na mersi kastigu mas pior inda! <sup>30</sup>No kungsi kin ku fala kuma vingansa pertensil; i el ku na torna. I fala utru bias kuma Siñor na julga si pobu. <sup>31</sup>I kusa meduñu pa kai na mon di Deus bibu!

<sup>32</sup>Bo lembra di dias ku pasa. Na ki tempu, dipus ku bo risibi lus, bo fika firmi na garandi luta di kansera. <sup>33</sup>Utru ora bo ta kobadu, bo ta maltratadu dianti di tudu jinti; utru ora bo fika na ladu di kilis ku na tratadu de manera. <sup>34</sup>Bo ta toma parti na sufrimentu di kilis ku staba prezu. Oca ku jinti toma bo kusas, bo sufri ku alegria, pabia bo sibiba kuma bo tene dentru di bos rikesa mas minjor ku ta tarda pa sempri. <sup>35</sup>Asin, ka bo bota bo

**10.13:** Sal 110.1 **10.14:** Jon 17.19 **10.16:** Kap 8.10-12; Jer 31.33-34 **10.19:** Kap 9.8,12; Ef 2.18

**10.20:** Mat 27.50-51 **10.22:** Ez 36.25; 2 Kor 7.1; Ef 3.12; 1 Jon 3.21 **10.23:** 1 Kor 1.9; 10.13; 1 Tes 5.24; 2 Tes 3.3

**10.24:** Rom 15.2 **10.25:** At 2.42; Rom 13.11

**10.26:** Num 15.30; 2 Ped 2.20-22 **10.27:** 2 Tes 1.7-8

**10.28:** Lei 17.2-7; Mat 18.16 **10.29:** Mat 12.31-32;

1 Kor 11.29 **10.30:** Lei 32.35-36 **10.31:** Luk 12.5

**10.32:** Fil 1.29-30 **10.33:** Fil 1.7; 4.14 **10.34:** Mat 25.36;

2 Tim 1.16 **10.34:** Mat 5.12

fiansa, pabia i ta tisi garandi purbitu. <sup>36</sup>Bo pirsisa di firmesa pa bo fasi vontadi di Deus, pa bo pudi yangasa kil ki fala i na da. <sup>37</sup>Skritura fala:

“Mas un bokadu, kil ku na bin i na bin;  
i ka na tarda.

<sup>38</sup>Kil ku sedu justu i na vivi pabia di si fe.

Si i rakua, N ka na kontenti ku el.” <sup>39</sup>Anos no ka sta na ladu di kilis ku rakua, e pirdi: no sta na ladu di kilis ku fia, e ngaña salbason.

### Jinti ku tenba fe

**11** <sup>1</sup>Fe i sertesa di kusas ku no na pera; i proba di kil ku no ka oja. <sup>2</sup>Suma ku jinti di antigu tenba fe, e ku manda Deus ngaba elis.

<sup>3</sup>Fe ta pui no ntindi kuma Deus kumpu mundu ku si palabra. Asin, kil ku ojadu i fasidu di kil ku ka ta ojadu.

<sup>4</sup>I fe ku pui Abel da Deus sakrifi-siu mas bon di ki kil di Kain. E ku manda Deus ngabal kuma i justu; i kontenti ku si oferta. Pabia di fe, te dipus di mortu, i na papia inda.

<sup>5</sup>I fe ku pui Enok lebadu pa utru vida sin muri. Ningin ka pudi ojal pabia Deus lebal. Antis di lebadu, i tenba bon tustumuñu kuma Deus kontenti ku el. <sup>6</sup>Ningin ka pudi pui Deus kontenti ku el sin fe, pabia kil ku na bai pa el i ten ku fia kuma el i ten, kuma i ta da pagamentu tamba pa kilis ku buskal.

<sup>7</sup>I fe ku pui Noe, oca Deus avisal di kusas ki ka oja inda, i seta, i kumpu barku pa salba si familia. Pabia

di kila, mundu kondenadu, ma Deus oca Noe justu pabia di si fe.

<sup>8</sup>I fe ku pui Abraon kudi oca Deus comal; i bai pa un lugar ki tenba ku risibi pa yardansa. Oca i sai di si terra, i ka sibiba nunde ki na bai. <sup>9</sup>I fe ku pul i sinta suma stranjeru na terra ku Deus fala i na dal. I mora na tenda, suma Isak, ku Jakó, ku risibi tamba mesmu purmesa ku el, <sup>10</sup>pabia Abraon na peraba ki prasa ku Deus diseña, i kumpu, ku tene bon alisersu.

<sup>11</sup>I fe ku pui propi Sara pa i risibi puder di preña; i padi oca ki pasaba ja idadi, pabia i oja kuma kil ku fala i na dal fiju i fiel pa fasil. <sup>12</sup>Asin, na un omi ku pirdi tudu forsa di nobresa, i nasi multidon di jinti suma strelas di seu, suma reia na roda di mar ku ka pudi kontadu.

<sup>13</sup>Tudu e jinti e muri ku fe sin ciga di yangasa ki kusas ku Deus fala i na da elis, ma e oja elis di lunju, e fika kontenti ku elis, e konfesa klaru kuma elis i ospri strañu na tera. <sup>14</sup>Kilis ku ta fala asin e mostra klaru kuma e na buska un tera pa elis. <sup>15</sup>Si na bardadi se sintidu staba na nunde ke sai, e tenba manera di riba, <sup>16</sup>ma e misti un tera minjor di ki kila, ku sedu na seu. E ku manda tamba Deus ka sinti borgoña delis,

**10.36:** Luk 21.19; Gal 6.9; Ef 6.11 **10.37:** 2 Ped 3.9

**10.38:** Rom 1.17 **11.1:** Rom 8.24-25; 2 Kor 4.18

**11.3:** Jon 1.1-3; 2 Ped 3.5 **11.4:** Kum 4.4

**11.5:** Kum 5.22-24 **11.7:** Kum 6.13-14,22

**11.8:** Kum 12.1,4 **11.9:** Kum 12.8; 13.3,18; 26.3-4; 28.13-14 **11.10:** Kap 12.22; 13.14; Apok 21.2,10

**11.11:** Kum 17.19; 18.11,14; 21.1-2; Is 51.2; Luk 1.36

**11.12:** Kum 22.17; Rom 4.17-20 **11.13:** Jon 8.56

**11.13:** Kum 23.4; 1 Kron 29.15; 1 Ped 1.17

**11.14:** Kap 13.14 **11.16:** Sai 3.6,15; Fil 3.20

pa e comal se Deus, pabia i ranja elis un prasa.

<sup>17</sup>I fe ku pui Abraon, oca ki probadu, i pursenta Isak. El ku risibi purmesas i staba pruntu pa sakrifika ki uniku fiju, <sup>18</sup>kontudu Deus falalaba: "I na Isak ku bu jorson na sai." Abraon fasi di konta kuma, Deus ten puder te di lantandal di mortu. <sup>19</sup>Na un sintidu i di mortu ki risibil.

<sup>20</sup>I fe ku pui Isak bensua Jakó ku Esaú; i fala na kusas ku tenba ku kontisi.

<sup>21</sup>I fe ku pui Jakó, oca i pertu muri, i bensua kada un di fijus di José; nkuñadu na si manduku, i adora Deus.

<sup>22</sup>I fe ku pui José, na fin di si vida, i fala di saida di Israel na Ejitu; i konta elis ke ke dibi di fasi ku si os.

<sup>23</sup>Oca ku Moisés padidu, i fe ku pui si papes sukundil tris mis, pabia e oja kuma i seduba mininu bonitu. E ka medi ordi di rei.

<sup>24</sup>I fe ku pui Moisés, oca ki sedu omi, i nega pa i comadu fiju di fiju femia di Faraó. <sup>25</sup>I kuji pa sufri maltratu juntu ku pobu di Deus, te pa i goza puku tempu di sabura di pekadu. <sup>26</sup>I oja kuma, pa i njutidu

pabia di Mesias i ten mas balur di ki tudu rikesa di Ejitu, pabia i pui si uju na pagamentu ku na bin bin. <sup>27</sup>I fe ku pul i sai na Ejitu, i ka medi raiba di rei. I fika firmi suma kin ku na oja Deus ku ka ta ojadu. <sup>28</sup>I fe ku pul i fasi festival di Paskua; i waga sangi, pa anju di mortu ka toka purmeru fijus di pobu di Israel.

<sup>29</sup>I fe ku pui israelitas kamba Mar Burmeju suma na tera seku. Tropas di Ejitu mistiba kamba tamba, ma e foga na mar.

<sup>30</sup>I fe ku pui mura di Jerikó kai, dipus de da volta del seti dia. <sup>31</sup>I fe ku pui Raab, ki minjer di mau vida, i ka muri juntu ku ki disobdientis, pabia i risibi spions na si kasa ku bon vontadi.

<sup>32</sup>Ke mas ku N pudi fala? I ta faltan tempu pa N konta di Jidion, Barak, Sanson, Jeftá, Davi, Samuel ku anunsiaduris. <sup>33</sup>I fe ku pui elis e vensi rehus, e fasi kusa justu, e yangasa kil ku Deus fala i na da elis, e fica boka di lions, <sup>34</sup>e paga forsa di fugu, e kapli di mortu di spada; na se frakesa e yangasa forsa; e ngaña forsa na gera, e serka tropas stranjeru. <sup>35</sup>Minjeris torna risibi se mortus ku lantandadu.

Utrus kastigadu tok e muri, e nega seta libertason, pa e pudi yangasa minjor resureison. <sup>36</sup>Utrus fasidu trosa, e sutadu; utrus pudu korenti, e ficadu na kalabus. <sup>37</sup>E dadu ku pedra, e seradu na metadi, e matadu ku spada; e yanda bistidu ku kuru di karnel ku kabra; e seduba koitadis ku fadiga ku maltratu. <sup>38</sup>Mundu ka mersiba tene elis. E ta

**11.17:** Kum 22.1,9; Tia 2.21 **11.18:** Rom 9.7

**11.20:** Kum 27.27-29,39-40 **11.21:** Kum 48.5,16,20

**11.22:** Kum 50.24-25; Sai 13.19 **11.23:** Sai 1.16.22; 2.2

**11.24:** Sai 2.5-10 **11.25:** Sai 2.11-15 **11.26:** Kap 10.35;

13.13 **11.27:** Sai 10.28-29 **11.27:** Sal 16.8

**11.28:** Sai 12.21-23 **11.29:** Sai 14.21-29 **11.30:** Jos 6.20

**11.31:** Jos 2.1-7; 6.17,22-25; Tia 2.25 **11.32:** Šef 4.6;

6.11; 11.1; 13.24; 1 Sam 1.20; 16.1,13 **11.33:** Jos 13.6-7;

Šef 14.5-6; 2 Sam 8.1-14; Dan 6.22 **11.34:** Dan 3.25

**11.34:** 2 Sam 21.16-17; 2 Re 6.15-17

**11.34:** 1 Sam 14.13-15; 17.48-51 **11.35:** 1 Re 17.22-23;

2 Re 4.35-37 **11.35:** At 7.58-60 **11.35:** Fil 3.11

**11.36:** Kum 39.20; Jer 20.2; 37.15 **11.37:** 1 Re 21.13;

2 Kron 24.21; At 14.19 **11.38:** 1 Re 18.4; 19.9

yanda-yandaba na matus ku montis; e ta sukundiba na kobas ku burakus na con.

<sup>39</sup>Esis tudu e ngabadu pabia di se fe, ma e ka yangasa kusa ku Deus fala i na da elis, <sup>40</sup>pabia Deus, ku pensamentu na nos, i tenba un planu minjor, ku son juntu ku nos e pudi sedu pirfitu.

### Firmesa na tempu di probason

**12** <sup>1</sup>Anos tambu, ku tudu e tustumuñas ku rodianu suma nuven, no sakudi tudu kusa ku ta mbaransanu, ku pekadu ku ta lestu ku maranu; no kuri ku tudu mpeñu na kurida ku sta no dianti. <sup>2</sup>No pui uju na Jesus, kil ku no fe ta kumsa nel, i ta kaba nel. Pabia di sabura ku staba si dianti, i nguenta krus, i dispreza borgoña di ki ora; i bai sinta na direita di tronu di Deus.

<sup>3</sup>Bo pensa na kil ku nguenta manga di kusa ku jinti mau lantanda kontra el. Asin bo ka ta pirdi koražen, pa bo dismaja. <sup>4</sup>Na bo luta kontra pekadu bo ka risisti inda tok bo tiradu sangi. <sup>5</sup>Bo diskisi ja di ki palabra di koražen ku Deus konsija bos suma si fijus, i fala:

“Ña fiju, ka bu njuti disiplina di Siñor;

ka bu disanima ora ki na raprindiu,

<sup>6</sup>pabia Siñor ta disiplina kil ki ama.

Tudu kil ki coma suma si fiju, i ta sotal.” <sup>7</sup>Kil ku bo na sufri i pa bo disiplina. Deus na trata bos suma fijus. Kal fiju ku si pape ka ta krial? <sup>8</sup>Si bo

ka ten kriason ku tudu fiju dibi di ten, nta abos i fijus ku padidu fora di kasamenti; bo ka sedu fijus propi.

<sup>9</sup>Tambu no tene no papes de mundu ku ta disiplinanu; no ta da elis rispitu. Nta no ka pudi sužeta mas inda no Pape spiritual pa no tene vida? <sup>10</sup>Elis e krianu pa puku tempu suma ke ntindi, ma Deus ta krianu pa no purbitu, pa no pudi tene vida puru suma el. <sup>11</sup>Na bardadi, nin un kastigu ka ta sabi na ki ora; i ta punu tristi, ma mas tardi i ta da bon frutu di pas na kilis ku kriadu nel, pa e tene vida limpu.

### Manga di konsiju

<sup>12</sup>Asin bo lantanda bo mon kansadu, bo tesanta bo juju ku na tirmi! <sup>13</sup>Bo kumpu kamiñu diritu pa bo yanda nel, pa pe manku ka kabanta mankusi, ma pa i kuradu.

<sup>14</sup>Bo buska ten pas ku tudu jinti; bo buska tambu un vida puru, pabia sin el ningin ka na oja Siñor. <sup>15</sup>Bo toma sintidu pa ka ningin pirdi fabur di Deus, pa ka nin un rais malgos nasi pa kansa bos, i bin venena manga di jinti; <sup>16</sup>pa i ka ten

---

**11.39:** V 2,13 **12.1:** 1 Kor 9.24 **12.2:** Luk 24.26; Fil 2.8-11 **12.2:** At 2.33 **12.3:** Mat 11.19; 12.24; Luk 15.2; Jon 9.16,24 **12.3:** Gal 6.9 **12.5:** Jo 5.17; Dit 15.20 **12.6:** Sal 94.12; Dit 3.11-12; Apok 3.19 **12.7:** Lei 8.5; 2 Sam 7.14; Dit 13.24 **12.10:** Sir 11.44 **12.12:** Is 35.3 **12.13:** Gal 6.1 **12.14:** Mat 5.8-9; Rom 12.18; 2 Kor 7.1; Ef 4.3; 1 Ped 3.11 **12.15:** 2 Kor 6.1; Gal 5.4 **12.15:** Lei 29.18 **12.16:** Kum 25.33-34

ningin na bo metadi ku vida susu, o algin ku pensamentu de mundu, suma Esaú, ku bindi si diritu di garandesa pabia di un pratu di kumida. <sup>17</sup>Bo sibi kuma, mas tardi, oca i bin misti risibi benson di yardansa, i tujidu el, pabia i ka oja manera di rabida kil ki fasi, kontudu i buskal ku larma.

<sup>18</sup>Bo ka ciga na ki monti ku pudi palpadu, ku na yardi ku fugu, sukuru pretu nok, ku turbada, <sup>19</sup>ku korneta ku na toka, ku fala ku na papia. Oca ke obil, e pidi pa ka i papia mas ku elis, <sup>20</sup>pabia e ka pudi nguenta ki ordi ku dadu, kuma nin ki un limaria ku toka na monti, i na matadu ku pedra. <sup>21</sup>Kusa ke oja i seduba meduñu dimas, tok Moisés fala kuma i na tirmi ku medu.

<sup>22</sup>Ma bo ciga pa monti di Sion, pa prasa di Deus bibu, Jerusalen di seu, ku si manga di milyaris di anju <sup>23</sup>ku sta na juntamentu alegri; pa igreža di purmeru fijus di Deus ku se nomis sta skritu na seu; pa Deus ku sedu juis di tudu jinti, pa spiritus di jinti justu ku sta ja pifritu, <sup>24</sup>pa Jesus ku ranja nobu kontratu entri nos ku Deus, pa sangi ku wagadu, ku ta fala minjor di ki sangi di Abel.

**12.17:** Kum 27.34-38 **12.18:** Sai 19.12,18-19; Lei 4.11

**12.19:** Lei 5.5,23-25; 18.16 **12.20:** Sai 19.13

**12.22:** Gal 4.26; Fil 3.20; Apok 3.12; 21.2 **12.23:** Sai 4.22;

Tia 1.18 **12.24:** Sai 24.8; Mat 26.28; 1 Ped 1.2

**12.24:** Kum 4.10 **12.25:** Kap 2.2-3 **12.26:** Sai 19.18;

Ažeu 2.6 **12.27:** Sal 102.25-26; Mat 24.35; 2 Ped 3.10;

Apok 21.1 **12.29:** Kap 10.27; Lei 4.24; Sal 97.3; Is 66.15;

2 Tes 1.8 **13.1:** Rom 12.10 **13.2:** Kum 18.1-5; 19.1-3;

Mat 25.35; Rom 12.13; 1 Tim 3.2 **13.3:** Mat 25.36;

Rom 12.15 **13.4:** Gal 5.19-21; Apok 22.15

**13.5:** Mat 6.25-34; Fil 4.11-12,19; 1 Tim 6.6-10

**13.5:** Kum 28.15; Sal 37.25

**13.6:** Sal 27.1; 56.4,11; 118.7

<sup>25</sup>Bo toma sintidu pa ka bo nega obi kil ku na papia. Kilis ku nega obi vos ku na papia ku elis na tera e ka kapli kastigu; ku fadi anos, si no da kosta pa kil ku na papia ku nos la na seu. <sup>26</sup>Na ki dia si vos pui tera tirmi, ma gosi i fala kuma, mas un bias i ka na fasi son tera tirmi, ma seu tamba. <sup>27</sup>Agora e palabra “mas un bias” mostra kuma kusas ku ta bulbuli, ku sedu kusas ku kumpudu, e na mundantadu, pa kilis ku ka ta bulbuli pudi fika.

<sup>28</sup>Renu ku no risibi ka pudi bulbulidu. Asin no ba ta fala Deus obrigadu, no adoral ku rispitu, ku medu, suma ki misti, <sup>29</sup>pabia no Deus i un fugu ku ta kaba ku tudu.

### Kuma ku no dibi di agrada Deus

**13** <sup>1</sup>Bo kontinua ama njutru suma ermons. <sup>2</sup>Ka bo diskisi di risibi ospri na bo kasa. Utru jinti ku fasi asin e risibi anjus sin e ka sibi. <sup>3</sup>Bo lembra di kilis ku sta prezu, suma ku bo sta prezu ku elis. Bo lembra di kilis ku maltratadu, suma ki pudi sedu na bo kurpu tamba.

<sup>4</sup>Pa tudu jinti rispita kasamenti. Kama di kasadu pa ka i mancadu ku pekadu. Deus na julga kilis ku ta sta na vida susu, ku pekadu seksual.

<sup>5</sup>Bo libra di faimadesa di diñeru. Bo fika kontenti ku kil ku bo tene, pabia Deus fala: “N ka na disau, nin N ka na bandonau.” <sup>6</sup>E ku manda no pudi fala ku fiansa:

“Siñor i ña Judadur; N ka na medi.

Ke ku algin pudi fasin?”

<sup>7</sup>Bo lembra di bo pastoris ku kontata bos palabra di Deus. Bo pensa na manera ke yandaba; bo remenda se fe.

<sup>8</sup>Jesus Kristu i mesmu aonti, ku aos, pa sempri. <sup>9</sup>Ka bo disa manga di koldadi nsinamentu strañu tira bos na bo kamiñu. I mas bon pa no korson risibi forsa di grasa di Deus te pa sigi regres di kumida, ku ka tisi nin purbitu pa kilis ku na yandaba di ki manera.

<sup>10</sup>Saserdotis ku ta sirbi na tenda sagradu e ka ten diritu di kume na altar ku no tene. <sup>11</sup>Êf di saserdotis ta leba sangi di limaria pa lugar mas sagradu di tudu pa ronia pa pekadu, ma karni di ki limaria i ta kemadu fora di kampamentu. <sup>12</sup>E ku manda Jesus tamba muri fora di prasa, pa i pudi santifika pobu ku si propi sangi. <sup>13</sup>Asin no bai pa el, fora di prasa; no sufri ki njuti ku el i njutidu, <sup>14</sup>pabia li na tera no ka tene un prasa ku na fika pa sempri, ma no na buska kil ku na bin. <sup>15</sup>Asin, na Jesus, no ba ta da Deus sempri sakrifisiu di ngabal, ku sedu oferta di no boka ku ta kontadi di si nomi. <sup>16</sup>Ka bo diskisi di fasi ben, bo rapati ku utrus kil ku bo tene, pabia i e koldadi sakrifisiu ku Deus ta kontenti ku el.

<sup>17</sup>Bo obdisi bo pastoris, bo suzeta elis, pabia e ka ta kansa jubi pa bos, suma kin ku ten ku da Deus kontadi di bo alma. Bo juda elis pa e pudi fasi e tarbaju ku alegria, pa ka e ba ta fasil ku dur di korson, pabia de manera i ka ta bali pa bos. <sup>18</sup>Bo ora pa nos, pabia no ten sertesa

kuma no ten konsiensia limpu, suma ku no misti fasi sempri kil ki diritu. <sup>19</sup>N roga bos ku mpeñu pa bo ora, pa N pudi tornadu pa bos mas dipresa.

### Palabra di kabantada

<sup>20</sup>N misti pa Deus ku ta da pas, ku lantanda di mortu no Siñor Jesus Kristu, garandi Pastor di karnel, pabia di sangi di kontratu ki fasi ntidu, <sup>21</sup>pa i fasi bos kompletu na kil ki bon, pa bo pudi fasi si vontadi. N misti pa i fasi di nos kil ki misti pa no sedu, pa mon di Jesus Kristu, kil ku no na da gloria pa sempri. Amen.

<sup>22</sup>Ermons, N pidi bos pa bo nguenta e palabra di konsiju, pabia e karta i ka kumpridu di ki manera. <sup>23</sup>N misti pa bo sibi kuma no ermon Timótiu i largadu ja. Si i ciga sedu, N na bai ku el ora ku N na bai visita bos.

<sup>24</sup>Bo fala manteña pa tudu bo garandis ku tudu pobu di Deus. Kilis di Itália manda bos manteña. <sup>25</sup>Fabur di Deus ta sta ku bos tudu. Amen.

---

**13.7:** V 17 **13.8:** Kap 1.12; Jon 8.58; Apok 1.4

**13.9:** Ef 4.14; Kol 2.4,8,16 **13.10:** 1 Kor 9.13; 10.18

**13.11:** Sir 16.14,27; Num 19.3 **13.12:** Jon 19.17;

At 7.58; Apok 14.20 **13.14:** Fil 3.20 **13.15:** Ef 5.20;

1 Ped 2.5 **13.16:** Is 58.6-7; Rom 12.13; 2 Kor 9.9;

Fil 4.18 **13.17:** Ez 33.7-9; At 20.28; 1 Tes 5.12; 1 Tim 5.17;

1 Ped 5.2-4 **13.18:** Rom 15.30; Ef 6.19 **13.19:** Filem 22

**13.20:** Rom 15.33 **13.20:** At 2.24 **13.20:** Is 40.11;

Jon 10.11 **13.20:** Mat 26.28 **13.21:** Kol 4.12

**13.21:** Rom 16.27 **13.22:** 1 Ped 5.12 **13.23:** At 16.1

**13.25:** Rom 16.20